



16. august 2023

Inatsisartut ingerlatsinermut maleruagassaasa § 37 imm. 1 tunngavigalugu Naalakkersuisunut ukuningga apeqquteqaateqarpunga:

Naalakkersuisunut apeqquteqaatit:

1. Kalaallit Nunaanni tamat oqartussaaqataanerat ineriartortinniarlugu nukittorsarniarlugulu Naalakkersuisut suut pilersaarutigaat?
2. Takornariaqarnerup tungaatigut inatsisilerinikkut aqutsinikkullu kommuunini innuttaasut Naalakkersuisuniit qanoq peqataatinneqarpat?
 - a. Kommuunit malinnaatinnerulernissaanik Naalakkersuisut pilersaaruteqarnerlutik, qanorlu?
 - b. Innuttaasut malinnaatinnerulernissaanik Naalakkersuisut pilersaaruteqarnerlutik, qanorlu?
3. Soorlu Ilulissani takornariaqarnerpaaffiani illoqarfimmi innuttaasut allaat ikinnerulersarneri Naalakkersuisunit qanoq isumaqarfigineqarpa?
 - a. Pisariaqarfiini ingammik umiarsuit takornariartaatinit takonarissat killilersimaartinneqarsinnaanissaat Naalakkersuisut suliniutigineqarnissaanik eqqarsaatersuuteqarnerlutik?
4. Innuttaasut illoqarfinni takornariaqarfiunerpaasuni piffimmini qanoq isikkulimmik takornariaqarfiunissamik toqqaannaq aaliangersaaqataasinnaanissaat Naalakkersuisut qanoq isumaqarfigaat?
 - a. Aaliangersaaqataasinnaaneq tamanna qanoq qulakkeerneqarsinnaassanersoq, Naalakkersuisut qanoq takorloorpaat?
5. Pineqartumut Naalakkersuisut allanik paasissutissiisinnaanerlutik?

(Inatsisartunut ilaasortaq Bjørk Lange Olsen, Demokraatit)

Tunngavilersuut

Qularutissaanngilaq takornariaqarnerup pingaarutilimmik aningaasatigut isaatitsiffiummat. Mittarfissuillu pilersinneqartussat aallaavigalugit takornariaqarnerup ukiuni amerlasuunit aggersuni annertusinerunissaa takussutissaqartinneqarpoq.

Matumanili pingaaruteqarpoq immitsinnut puigunnginnisarput. Nunarput innuttaasugullu puigunnginnissai. Ullumikkut Ilulissani takornariaqarnerpaaffiani takonarissat inoqartuniit amerlanerulersarput, kisiannili ima isumaqanngilaq takonarissat taakku piffimmi aningaasaqarnikkut pitsaasumik malugineqarsinnaasumillu nikeriartitsisut. Assersuutissaavoq takonarissat aningaasat annikitsuinnaat piffimmi atortaraat, tamannalu ajornartorsiutaavoq.



DEMOKRAATIT
DEMOKRATERNE

Qanimut tamat oqartussaaqataaneq nuannaartorisaraara isumaqarpunga qanoq ingerlatseriaatsit aaqjissuussaanerillu qiviartariaqarigut, piffimmi takornariaqarnikkut pissutsinut innuttaasutut nunaqartuusutut aaliangeeqataasinnaalluni.

Ullut suliffiusut qulit iluanni apeqqutinnut akissutisinissara qilanaaraara.